

甘水仙源錄卷之七

息七

甘水仙源錄卷之七

息七

夷門天樂道人李道謙集

崇真光教淳和真人道行之碑

嘉議大夫史禮部尚書高鳴撰

全真之教始於少陽君興於重陽子大盛於
長春公長春傳之清和清和傳之真常真常
傳之誠明誠明傳之淳和淳和以大元數之
實為宗門五代祖諱志坦字公平出於相州
湯陰王氏父諱忠性慤願以貲雄其鄉母岳
氏閨壺有微妊夢古仙來告曰此子成人必

令學道否則將禍而家已而公生焉自童弁
不好弄戲且不喜華羨物甫及冠即著道士
服師北京盧尊師師乃丹陽馬公之法孫洞
清于公之高弟也時以道錄居京之華陽宮
盧素嚴厲少忤輒責誚之殆若官府然故居

息七

門下者鮮克終公叅謁之餘力營百役至於
膏旣漏礎之細躬執靡有懈盧亦憫其勤而
誠復加以禮癸未秋謁大宗師長春真人于
宣德一見器之傳付祕訣既恐無以善其後
遂行化興中義錦間日丐一食雖蚊蚋嘍敗

亦不屑棄已匪茆而居不計何地遇昏暮即
止戊子聞清和宗師駐燕知道統所在叅禮
焉師愛其力行大加獎拔公忽有開悟恍若
神明頓還舊觀無幾何徑入金坡坐而鍊化
窮深抵幽木茹澗飲人莫見其面其志愈堅

苦雖晦跡十餘年無賢不肖皆曰金坡王先
生有道之士也甲辰春真常真人李公素高
其玄屢以書見招來拜為大度師夏五月從
真常北上叅受三洞祕籙以祈禳訶禁濟人
其疾病藥石不可為者假符水或以袂拂之

罔不立驗咸畏服其神

皇太后欽挹真風寵賚以禮公益自謙遜惟
顛墜是懼每蒙慰諭必歸功於聖神若私不
敢有者其知本不伐也如此留居闕庭者六
年還燕為教門都提點燕去和林里千六百

息七

二

有奇凡赴十有七馳驅寒暑略無艱苦狀蓋
以輔翼玄教為已任雖九死不悔也

先皇帝踐祚之元年龍集辛亥詔真常公佩
金符馳傳祀嶽瀆以公為輔行繼而奉香代
祭者又四皆以祈天求命歛福錫民為意癸

丑上問養生之術對曰此山林枯槁之士所
宜非天子之急務也天子代天理物當順天
心與民興利則天降之福壽近大赦天下革
故鼎新民樂生活開創以來戕橫天闕精魂
無依非求諸冥冥中而莫之能救是所謂恩
已及於八方澤又浸於九原矣因奏修黃籙
普天大醮上喜曰天垂此教以利天下即詔
公命真常公于燕之長春宮陳設醮事所須
旅百俱出內帑一無擾於民食墨得甲寅三
月十有五日禮備將行雲膚寸而雨公密禱

於天天爲之靜風月肅然星辰可摘又有卿
雲鸞鶴之應公卿文士咸作歌詩以贊其瑞
繇是道價益重一時貴遊悉奔走承事或執
弟子禮真常馱世誠明嗣之公之力居多中
統建元春入關旋及覃懷陟天壇愛之留玉

息七

三

峯前期歲相州神霄宮久虛玄席諸耆宿士
庶懇公主之明年會真常葬又明年復入金
坡至元改元燕人楊提領者素慕玄教於私
第之後圃作環庵一區願得天下清修高尚
之士奉之僉曰金坡王練師可即禮致焉三

年冬誠明復以提點事懇公七年誠明上仙
今皇帝詔公襲位仍加真人號以九年十一
月二十有七日蛻形於長春之玄堂得年七
十有三越明年門弟子梁志安常志敏等奉
其衣冠寧神於金坡山下從治命也時天氣
肅冽比襄事熙熙然化而陽春執紼祖較者
萬餘人汗皆浹背咸嗟異之以謂純誠之驗
也所著信心錄六牛圖傳於世葬之明年志
安志敏等狀公之行來謁銘鳴治彰德時蓋
嘗以疏請公主神霄從遊甚款故習其爲人

義不可辭公美儀觀愛讀書尤喜性理學深得奧義好施與困乏無聊者不以己之有無謙恭寬碩克己下人故度門弟子者數千人若觀若庵者又營建百餘區可謂能弘其道矣嗚呼以公平日陰功濟物之心嚮在闕庭

假之以政救時行道焉知不有如行符設醮之功耶若夫將適遼東也禱之而愈風痺又去許昌也空中傳玉帝有命其靈異若是者甚多然實非公之本心且有淳和真人傳在

茲略而不書銘曰

混沌既死大道窈冥乃醜其醇乃濁其清喫
詬以形勃礪以情拱璧而先駟馬竟盜焉夸
矜天開聖人藥石聾盲著書二篇強為之名
爰有漆園演為鯤鵬蝶夢破而虛白生然後
使混沌復起大道復明代有人焉玄風日宏

息七

四

有來重陽莫之與京孰其似之淳和是承挺
焉志堅夷焉心衡嗒焉尸居而聞望震驚寂
然無聲澹然無營眇翩翩而獨征砥柱中央
萬古不傾力提玄綱惟公主盟雖以符永藉
名而救世是宜羔鴈待之如老更金坡蒼蒼

草木光榮衣冠有藏功行有銘而復返其精
抑將乘泠泠之風御顛顛之氣遊元洲而戲
赤城也耶

願真冲虛真人毛尊師蛻化銘

宣授河南府路提舉學校官李國維撰

人命於天地兩間事莫大於生與死也自生
至死之際善惡所歸其可以見之矣且莫高
者天莫厚者地在天而日月有晦蝕在地而
山川有崩陷天地尚不能久有壞如此而況
於人乎乃知生不常存惟靜而復命曰常死

而不忘者壽蓋有道存焉耳自大道既隱人
慾滋熾不可救藥幸鍾呂而下降及近代全
真之教興有王重陽者出化馬譚丘劉於海
上相從往返東西二都仙跡顯著而後遠近
向風而流傳漸久彌滿四方遊其門而學者

息七

五

不知其幾萬千人至於識性命之理了死生
之事而不失其所者蓋亦寡矣百年以來能
繼重陽七真之風而不下於今之高道動化
關洛間衆所欽慕卓然獨異者冲虛真人毛
尊師也師諱養素字壽之道號純素子願真

冲虛真人其師號也家世平水太常博士兼
秘書郎沁州同知毛麾牧達之嫡孫牧達以
文行純粹前金明昌初朝廷重其名特徵授
宮教之職得其師道上下受益歷館閣通守
外郡於道無少違失宜其爲天所佑有賢子
孫其父諱德字日新以門資入仕不喜躁進
師性資冲澹雅有出塵之志幼喪母事父謹
敬鄉里以純孝稱旣長僑寓許昌貞祐初適
一羽客見過風神蕭爽師一見乃知其爲異
人謹奉之久羽客曰此子可教授以祕語師

問仙號曰我華山陳希夷也言訖忽失所在
自是心神渙釋道緣漸濃又於隱君子于宋
二老時親言教以謙光處已實德接物乃父
既即世喪祭禮闕棄家易服而道往禮太華
惠照真人田無礙即丹陽之法嗣也謹執几

杖清苦玄門幾二十年惠照異之丹書祕訣
又得其傳天光煥發日以益新殆不可掩因
志在四方不為物滯門人常志久系出素宦
方監永寧務棄官入道同諸貴遊請師居鳳
翼道院一日其子尋訪既見堅乞還歸師却

之曰吾既在道門去就自有時終不能為世
俗累爾無顧我子號泣而迴後天興河南之
變大朝王師南渡因復姑汾時官府道俗交
狀敦請同法屬王葉諸公棲霞党子春住持
玄都觀當其晉境飛蝗滿地民心懸急師率

息七

六

王葉輩齋戒致禱蝗悉飛去竟不成災人以
為靈應昭然精誠所致莫不尊敬之但福地
靖廬未能全忘其情乙未同諸門人常志久
由陝而南興葺洛陽朝元棲霞二宮及華陰
清華觀不數年金碧輪奐冠於他處丁酉汝

州官府狀請住北極觀己亥關洛荐饑豪富
閉糴師悉發餘糧均施困餒賴以活者甚衆
蓋平昔樂於賙急以仁爲己任如此辛丑清
和真人至終南以師宿德望重起爲棲霞提
點兼領披雲玄都寶藏八卦局時紫陽楊使
君行漕臺暨玉華王元禮西庵楊相正卿諸
公俱在洛與之遊相得甚厚道價增重光耀
一時甲辰副提點寂照大師吳志明北上齋
皇后懿旨有冲虛大師之號繼及真常掌教
大宗師銜命南下賜號願真冲虛真人既蒞

琳宮主盟師席薰戒嚴肅日無惰容庚戌舉
燕京都道錄韓公以自代退跡清華未幾韓
復歸燕棄世再奉掌教誠明真人法諭復領
朝元棲霞宮事師於性理之學尅意終世斯
須無少間斷故能透脫融貫全真正脉其造
之也不為不深一日炷香危坐即示歸寂之
語衆莫能測翌日晨興方理巾幘旣畢依墻
儼然立化神觀不衰是日朝霞亘天人有見
師翱翔其上者士子伊川楊君用登封韓仲
温因宿於宮嘆以爲異實己未七月上旬四

日也世壽八十有二凡聚徒闡教前後度門
人百數輦其遺骨瘞葬於本宮之先塋關洛
諸公多爲作傳及賦歌詩挽誄之有沉霞圖
卷傳於世翰林待制孟攀鱗京兆教授李庭
叙之甚詳門弟子王志冲張志佺同道判常
志久齋講師郭從道所作行狀謁余求誌辭
不能已余以謂甚哉道之難明也其道有成
不成由其人之悟不悟故前聖有道心唯微
之旨亦有謂朝聞道夕死可矣之語皆不以
達道爲易其所以悟而成者誠亦有所由來

必也所稟賦高明所遇合神異所以抱神守
一甚固積行累功甚勤自種時一點物真力
耕敏耘善始令終然後可望入其閫域矣師
生於姑汾長於賢祖考積慶之門得天地之
間氣其稟賦不必論也隱於許下遇希夷許

以可教遂授其妙道入太華禮田無礙授丹
書其遇合可知也內持孝敬以事親奉天
施慈仁以愛人及物此非積累之功行乎
隱居華之下洛之濱清淨虛寂餘四十載有
進無退此非抱神守一甚固者乎故卒能有成

脫塵網之中出化機之表脩然往來入於自
在逍遙之境界不亦宜乎後之學者可不景
行而加諸意抑謂自大朝奄有天下以至中
統改元當今皇天眷命

皇帝暨后妃太子諸王莫不敦尚玄風敬禮

息七

高士而師之所歸至善若此不可不為之銘

銘曰

太古之時人生之始壽而不夭仁而不鄙大
道既隱衰俗靡靡滋熾人慾泯絕天理輕妄
好惡勞煩聽視真趣之歸幾人而已在清流

中有純素子忘情名利遠跡朝市養氣煙霞
棲身山水伊水洛水嵩山華山徃求同志密
叩玄關當擾攘之際徜徉乎其間契遇高真
逸駕相攀傳授秘訣煨成大丹輟食調人救
時阻艱內持外修功成行完策名紫府垂範
黃冠塵緣方盡飈馭將還幻身外物付之等
閑汎霞璇空眇視塵寰陳跡在碑有志明刊
善始令終衆之所難不歸於地府不列之王
官生死無變於已而況乎利害之端豈亦不
幾於神仙之一班後人仰止拂石以觀

終南山圓明真人李練師道行碑

祖庭天樂道人李道謙撰

師姓李諱志源邠州三水縣人天挺至性宗
黨以孝悌稱自幼有冲舉志年未三十考妣
俱喪乃棄家絕累潔身入道師事本州玉峯

息七

九

觀全陽周君服勤左右數年匪懈全陽憫其
精懇遂付以修真微旨且使遊歷諸方叅證
心印至醴泉與同志裴公結茅以居遣欲凝
神虚心集道歷十有八載故得塵慮盡銷天
光內發鄉人李公崇尚高潔建道院率閭里

耆艾延至事以師禮無何全陽召之還邠賜
號圓明子俾主玉峯觀又嘗集衆言曰圓明
於道實有所得他日吾歸全之後汝輩當尸
祝之迨正大戊子冬十月全陽返真門衆遵
宿昔之命舉練師處師位練師勉從其請未
幾遷居京兆府城之西漢高祖廟凡昆季子
姪教育公溥遠近道屬靡不得其懽心始服
全陽付畀得人之哲天興初秦地受兵練師
挈衆出關寓陝州之雞足山尋遷洛陽長生
觀及河南破天朝遣使招集三教人練師率

衆北渡於東阿縣築栖真觀居之遠邇聞其名德之重請益受教者不可勝紀玄通子范尊師方主東魯道教事待之如伯仲時遣人候問起居資其不給甲午歲關輔畧定練師念及終南南時村活死人墓乃重陽祖師鍊

真之地曩者全陽意欲葺居以彰仙跡適丁金季之亂不克肯構即遣門人王志瑞等西歸耕占乙未叅軍齊大年與練師鄉里之舊時居趙州慕其道德矧悟真庵請至事之百色用度繼奉不輟丙申冬適燕謁處順堂掌

教清和宗師遇以殊禮署練師充真定路道
門提點且曰吾向詣長安祀香祖庭見公遣
人劄制南時勝跡吾就名與重陽成道觀矣
然此非細故公儻不親臨恐莫能濟練師還
趙之日繼令法弟吳志恒來充知觀戊戌冬

息七

十

京兆總管田德榮差官持疏往迓練師即日
命駕率百衆西還大行起建由是道緣益弘
門徒翕集不數年殿宇壯麗與宗聖上清遇
仙諸宮相甲乙辛丑春祖庭會葬之際道流
恒數千人洞真宗師舉練師提舉重陽宮練

師以正己而物正之道裨贊玄化與有力焉
丙午八月朔旦朝謁禮竟忽謂衆曰吾昨承
玄告不能久留世矣公輩各當以進修爲業
及此師祖勝緣實先師之志今克伸之吾歸
無慊矣可善主持無使中道而廢遂絕粒忘

言越五日沐浴更衣奄然解化春秋七十有
一門衆葬于本宮東北之仙塋庚戌冬掌教
真常真人奉上命委加玄教有道之士名號
以恩例追贈淵虛圓明真人仍升觀爲宮於

戲盛哉練師道器凝重上性謙冲律已容人

輕財重義生平不讀書凡視聽言動昭合經
旨當作務紛擾之甚其修鍊之功亦無時少
輟丈室之中惟巾盂几杖無長物一冠一袍
之外不置囊橐終日塊坐殆若與世相忘者
及其即之而飲人以和使人自有所得其教
息七
誘後進又能隨其根性高下各有所發明無
非願神毓氣誠意正心之要雖髫童之愚所
為不道亦未嘗以惡言斥辱但以善惡罪福
之報方便啓導之必使心自慚服以馴其化
其成就於人者如是至元癸酉秋重陽日提

點吳志恒每念練師薰陶切磋之惠思而不
忘丐予爲文用刻貞石以垂不朽向予與練
師同居仙境僅及十年仰慕高風亦樂道其
盛德仍系之以銘銘曰

真常之道無門無房誰其啓之教祖重陽東
遊海上四子傳芳支分派別化洽萬方圓明
老仙天挺道器丹陽裔孫全陽嫡嗣久進真
修功周德備或出或處有道有義仙仗西來
肯構南時門徒濟濟教化熙熙樓觀峩峩金
碧參差肇開神宇萬世之基善始令終曲肱

歛息形有生化道無終極我銘以辭無愧乎
實刻石琳宮後昆懿則

清虛大師把君道行錄

翰林侍讀學士正議大夫兼國子祭酒陳楚望撰

國家尊右三教道其一也為教者思寵遇之
優渥而歸美報上之念亦與國家相為無窮
是以道家者流必躬宮殿集徒侶崇奉玄昊
晨夕焚修以為

皇家祈天求命之地此乃天保下報上之遺
意而通明殿之所以建也天下之理通則明

人心本自虛明洞達一為外物所蔽則明者
塞矣塞則暗莫甚焉夫明必本於通不通未
有能明者也此通明之義是宜清虛大師把
君以是銘諸心而又以是名其殿也君諱德
伸字仲直世居唐邑幼而好學事親以孝聞

息七

十二

學廣聞多而以老氏虛心體道之要為入道
之門戶值貞祐南遷挈家襄陵十餘載二親
相繼而逝既終喪欲訪異人辭故里南遊至
蒙山受道於無塵子衛君無塵甚器重之為
立今名字自此黃冠野服惟意所適晚寓青

社養素於太虛宮先是有同門高士王君於
府城東南隅卜建觀基欲居雲遊之衆城東
二十里許購田園以備香供之具一旦遇仲
直道同志合悉以其地相付與且曰成吾志
者子也仲直躬率羽流銳意締構是時總管
于公元帥姜公及諸方信士隨心樂施助成
勝事崇通明之正殿立玉帝之尊儀方丈雲
堂齋廚庫庾廊廡雜舍以序營爲一新偉觀
落成之後每遇朔望自總管以次官行香致
禮以贊頌天子萬年之祝其歸美報上之一

念必使無負於尊右之初意此仲直之本志也玄門掌教大宗師真常真人名其觀曰通玄仍付以金欄紫衣號曰清虛大宗師誠明真人特授益都路道錄歲次乙亥朝廷遣使徵召留長春宮每事屢有咨訪特旨遷授提舉諸路道教以彰有德昔河內司馬子微受中嶽體玄潘君正一之法體玄受之於茅山昇玄王君昇玄受之於華陽隱居陶君自陶君至子微歷四世而子微被召於唐景雲間乃以治國猶治身之說納誨於睿宗自丹陽

宗師以是道傳之元元宋君元元傳之無塵
子衛君無塵子傳之仲直亦已四世而仲直
以有道榮膺召命他日奏對必能以正心誠
意開物成務之學啓沃聖心其視子微治國
治身之語殆異世而同符矣仲直老名而儒
行者也余與交最久頗知出處之大槩併筆
之以遺後之嗣教者使有知焉至元庚辰正
月吉日記

終南山樓觀宗聖宮同塵真人李尊
師道行碑

宣授陝西五路西蜀四川道教提點天樂真人李道謙撰

師姓李氏諱志柔字謙叔其先洺水人世業
農桑以門地清白見稱於鄉里昆季四人師
其次也生有宿慧及長雅好林泉蕭然有出
塵之趣父志微素嗜玄學先從趙州臨城縣

太古高弟開玄真人李君叅受全真教法及
學成行尊所作歌詩深契玄理泰和辛酉歲
師亦事開玄執弟子禮服勤日久開玄識為
受道器真筌秘訣付授無所隱師既蒙印可
自是鍊心養性丐食邢洺間雖絕粒數日立

志不少衰尋隱居仙翁廣陽兩山謝絕人事
者十有二年潛究道德性命之學大有所得
是時開玄及志微俱上仙其兄志端弟志藏
志雍皆從師遊蓋相尚以道也已而西山盜
起遷邢臺築通真觀居之道價日隆遠近向

息七

十四

慕願為門弟子者戶外之屨嘗滿庚辰春聞
長春宗師拔起海隅道經燕趙師以禮餞行
迨癸未八月長春奉詔南下師復迂於宣德
之朝元觀長春以師碩德宿望賜號同塵子
教以立觀度人將迎往來道衆為務師恪遵

玄訓於是始建長春於漳川奉天棲真於大名丙戌復詣燕覲寶玄堂叅證心印明年秋長春返真師杖屨南歸向化者益衆如磁州之神霄相州之清虛林慮之天平廣宗之大同燕都之洞真皆以次而舉其門弟諸方起建大小庵觀二百餘區化度道流稱是丙申清和宗師自燕入秦興復終南劉蔣祖庭時師亦侍行適樓觀宗聖宮道士張致堅以廢址係玄元道祖演道德二篇聖蹟天興兵亂焚毀殆盡具狀懇宗師乞為重建計宗師以

為無丹山豈能棲彩鳳有任公乃得馱大魚
即以狀付師俾任其責師奉命率徒剡荆蕪
陶瓦甃經之營之日漸成序丁酉冬真常宗
師署師大名邢洺兩路教門提點暨清真大
師號俾往來秦魏趙間以辦其事不十載雄

息七

十五

樓傑觀粲然一新庚戌洺州牧石德玉慕師
名節詣闕保奏賜黃金冠服加號同塵洪妙
真人甲寅春詔燕京大長春宮修普天大醮
師預高道之選事竟盤桓邢洺諸觀院有未
完者例為補葺中統癸亥誠明宗師命督還

樓觀凡有闕略悉加修飾方之前代增益數
倍矣至元改元奉德音禁民侵擾及使巨軍
旅無聽留宿以便焚誦三年丙寅夏六月二
日沐浴正襟儼若平日集衆於前戒以修身
利物爲念以後事嗣弟子石志堅主領翌日
脩然順化享年七十有八方其歛息之際宮
北焦家巷居民見空界五雲浮動仙音朗徹
奔往視之師乃昇矣畏暑流金顏色如生醮
祭三日權瘞於所居之丈室旣事遣介赴喪
於東門人忽一日大名奉天宮群鶴飛鳴下

直壇殿衆目仰瞻須臾訃音至識者以爲師
之神遊也後四年庚午門下諸耆宿卜以清
明日葬于宮東南成道觀之仙遊堂師純素
誠敬終日危坐望之毅然若不可犯逮其即
之教人不倦皆嚮養精氣神之祕其次則必
以退已進人罪福之方隨其高下接引之誕
惑幻怪之語不道也雖應緣世務中其願真
毓浩之業未始少間輕財重義慈儉謙裕殆
若夙成四方學徒不可勝計歲時供奉金帛
充溢悉歸常住爲興建費衣冠之外囊無私

積故能享其壽致高名所至之地權豪士庶
莫不再拜禮敬北面師事之自非胷中誠實
所格疇克爾耶以予嘗辱知於師比其葬也
石君志堅狀師平昔所行大槩懇來乞文將
刻之石予亦重師之有道不得以固陋辭即

息七

十六

因其實而紀之銘曰

希夷道妙言難窮誠之所感斯能通粵有人
兮宿慧充開玄嫡嗣同塵公早年穎悟超樊
籠仁慈清儉居謙冲虎龍交媾全真功鍊就
骨肉俱相融令名籍籍狀岱嵩所在請益來

叅同西翺東翔闡宗風隨機接物開盲聾草
樓灰燼施神工瑤壇玉宇增興隆功成道備
師知雄退身閑居德愈崇百年馱世遊太空
昭昭不亡存其中我作銘詩樹琳宮高天厚
地齊始終

洗燈子然先生道行碑銘

翰林直學士中順大夫陝西漢中道提刑按察副使王利用撰

道家者流蓋逸民之徒歟語其心則冲虛清
靜語其身則落魄不羈語其情則愛惡俱遣
語其志則持守不移其設教也不娶不宦不

葷不垢慈而祥貧而樂和柔謙退而已所以
老莊於周鍾離於漢呂仙之於唐繼繼承承
而不世出也其簪冠模範心跡塵俗者姑置
而勿論金源氏作重陽祖師飲甘泉而了道
丹陽馬師遇重陽以修真趙玉斗法嗣於丹

息七

十七

陽洗燈子光續於趙斗教法大闡而關中為
最者洗燈師與有力焉師諱逸期字守約姓
然氏京兆涇陽人大定辛卯分瑞于世骨相
異常弱不好弄及其長也神注于顏髯過于
腹澹然寡欲樂慕玄風父母欲妻之誓而弗

許遂禮清陽子桃花陳先生爲師灑掃叩詰
盡瘁服勞雖經叱訶貴辱未少退惰晝不懈
夜不寐者凡六寒暑矣清陽子曰汝雖經鍛
鍊功行未圓若非明師指訣詎可入於大乘
東山道人與汝有千劫緣當往叅禮力遣之
乃謝去至驪山遇了真子趙公方悟陳師之
言久矣仙機默有所契了真子曰靜功垂成
更加礪勵可也長安太白延祥觀乃唐朝玄
元道祖示現之跡吾丹陽師已爲建立全真
堂於其側他日必爲大福田汝可識之即日

西邁過醴泉邑人留居環堵遂乃踵納真息
內杜德機棄智忘言識心見性不三年造夫
大妙之域一日火光從環堵中出衆以為災
奔赴之至則見師瞑笑而坐衆感而異之方
悟火光乃神光也於是敬仰禮奉倍於他日

師狀其煩瀆出遊商顏卜築三陽草庵以止
息焉字其庵曰還真三陽地勢高迫泉素艱
得師指其震隅曰泉其在此乎發之泉果涌
出甘冽如飴遂賦詩曰一陽初動震天關須
信還真地有緣昨夜乖龍轟霹靂迸潮海眼

出寒泉居十歲聞望益彰門人大集鄉之善
友敦請西遊遂赴了真師所囑太白延祥觀
而住持焉士庶叅謁曲盡誠敬持紙幅懇求
翰墨者比比也或者辭色頗倨即書二詩付
之持歸披讀了無一字翌日再詣師席具白

息七

十八

其事師笑曰爾元不曾開眼再讀當有所見
展而視之墨跡儼存驚悔拜謝而去節度使
曳刺金紫之在鄧也病篤夢異人飲以法水
寤而即愈命工繪其像晨昏敬禮焉聞師歷
商過鄧使數人邀於路至則駭曰乃夢中所

遇之異人也出像示之惟蕭師知其意識諭
以詩曰憶昔垂綸逾四載至今猶自不吞鈎
可憐笑殺灘頭鷺辜負寒江一葉舟金紫拜
而受之歲壬辰秋七月居浙川召門下楊志
堅張道性語之曰比歲暮吾將行矣其年冬
十一月二十八日命道侶次第而坐曰諸公
盍爲我餞行因令高歌起舞時及四鼓乃留
頌曰四大元無主包羅物外身壺中天地好
歸跨紫麒麟頌畢擲筆端坐而蛻春秋六十
有二乃卜服餌谷之兆而權厝焉越明年門

人白志柔等欲改葬樊川了真師仙塋之次
焚香啓柩面如生亦足以表其平日修鍊之
功矣至元癸未冬十二月嗣法提點趙志暉
提舉王志靈知觀李道和輩持師道行之狀
介道交通真子乞文於予曰吾師襟靈明爽
息七
十九
虛室生白經文洞曉肆筆成書曩昔著述歌
詩幾四百首引援門弟子無慮千餘人墓雖
有誌若非道行碑銘恐無以白于世而壽于
後也予感其求請之懇乃為之銘曰
維鍊金兮純粹其精維質玉兮瓏玲其聲德

叅乎兩儀秀稟乎五行言乃矢口而發言乃
肆筆而成降龍伏虎兮翺翔乎河洛七八之
數乘風御氣兮逍遙乎鷗鵬九萬之程其來
也孤雲其去也迅霆孰知夫洗燈莫測之妙
盍視此翠琰不朽之銘乎

通真子秦公道行碑銘

遺山真隱元好問撰

通真子諱志安字彥容出於陵川秦氏大父
事軻通經博古工作大字為州里所重父諱
略字簡夫中歲困於名場即以詩為顯門之

學自號西溪道人殊有古意苦於雕琢而無
跡可尋一時文士極稱道之生二子通真子
其長也自早歲趣尚高雅三舉進士而於得
喪澹如也貞祐初避亂南渡西溪年在喜懼
親舊以祿養為言不獲已復一試有司至御

簾罷歸正大中西溪下世通真子已四十遂
置家事不問放浪嵩少間稍取方外書讀之
以求治心養性之要既而於二家之學有所
疑質諸禪子厭其推墮滉漾中而無可徵詰
也去從道士遊河南破北歸遇披雲老師宋

公於上黨略數語即有契乃嘆曰吾得歸宿之所矣因執弟子禮事之且求道藏書縱觀之披雲爲言喪亂之後圖籍散落無幾獨管岑者僅存吾欲力紹絕業鋟木流布有可成之資第未有任其責者耳獨善其身曷若與

息七

二十

天下共之通真子再拜曰謹受教於是補完訂正出於其手者爲多中間奉被朝旨借力貴近百方並進卒至於能事穎脫真風遐布而通真子之道價亦重於一時矣通真子記誦該洽篇什敏捷樂於提誨不立崖岸居玄

都垂十稔雖日課校讎其叅玄學受章句自
遠方至者源源不絕他主師席者皆竊有望
洋之嘆焉藏室旣成之五月謂徒衆言寶藏
成壞事關幽顯冥冥之間當有陰相者今大
緣已竟吾其行乎越二十五日夜叅半天無
陰翳忽震雷風烈大木隨拔遽沐浴易衣蛻
形於所居之樗櫟堂得年五十有七弟子李
志實等以丁未年月日奉其衣冠寧神於天
壇之麓披雲之命也所著林泉集二十卷行
於代徃予先君子令陵川予始成童乃識通

真子之大父閑居嵩山與西溪爲詩酒之友
者十五年通真子以世契之重與予道相合
而意相得也故志實輩百拜求爲其師作銘
今年春二月劉志清者復自濟上訪予新興
冰雪沍寒跋涉千里其勤有足哀者況於平

息七

二十一

生之言乃爲作銘鏤刻之松臺其銘曰
昔在窮桑發真源鑿民耳目神始全遭罹元
二坤軸旋壞劫欲墮未開前道山絕業疇當
傳百於苾芻了大緣若有人兮靖以專嚮也
易老同初筵玄綱力挽孰我先苦節終至孰

我堅網羅落簡手自編寒暑不廢朱黃研琅
函瓊笈閱九淵垂芒八角星日懸司功會計
盍上遷乃今出瓶鳥飛翮安常處順古所賢
死而不亡豈其然華陽九障名一焉豈不委
形殆賓天爲復延康轉靈篇爲復藥珠叅七
言爲復虎書校三元爲復逸度論九玄寧當
裏蹄燒紫煙寧當麟角煎集弦寧當千家課
芝田寧當七祖歸枯禪松臺有銘閱千年我
相夫子非頑仙

恕齋王先生事蹟

先生姓王氏名粹字子正北平之巨族也才
高而學贍少有詩名每一詠出膾炙人口然
與世踈闊不事舉業正大間薄遊鄧下時漆
水公節鎮唐鄧喜文章樂與士夫遊故中朝
名士多往依焉先生亦客其門會天兵南下
民遷襄陽先生亦漂泊江漢間甲午楊侯彥
誠被命招集三教醫卜等流一時士人皆得
保其妻孥復還中國楊侯獨迎先生至燕遇
真常大宗師即北面事之執弟子禮居長春
宮真常遇之甚厚復以上世師祖本行屬之

為傳將藏諸祕笈以永其傳先生遂居萃玄
堂研精致思旁求遠索紬繹而編緝之年四
十餘以癸卯九月無疾而逝不浹旬而見夢
於誠明張君其云為款曲不異平昔少焉作
詩而別云當時每恨花開早及看花開花已

息七

二十二

老花落花開能幾何回頭又見春光好詰旦
誠明以所夢之詩白於真常宗師真常嘆曰
子正仙矣聞者異之先生為人性恬澹無機
構廉潔貞介與人交悉待之以誠聞有道行
者雖窮居陋巷必親之嗜讀書作文尤長於

詩其五言雅淡有陶韋之風焉

訥庵張先生事蹟

先生諱本字敏之觀津人幼年與真常李真人爲同舍生初真常之入道也先生以嗣續規之既知牢不可奪乃各言所志而訣貝祐

二年先生中詞賦高第平生工於大篆及八分作詩殊有古意正大九年以翰林學士使北見留遂隱爲黃冠居燕京長春宮僅十年時真常掌道教兄事如昔盡禮給養之後遊濟南脩然而化

甘水仙源錄卷之七



七

二十三



